

45

4. ágúst

AUGLÝSING**um breytingar á samþykkt fyrir Útvegsbanka Íslands h.f., nr. 88 7. sept. 1932.****1. gr.**

Fyrsta málsg. 23. gr. orðist svo:

Fulltrúaráðið er skipað 5 fulltrúum og 5 varafulltrúum, sem kosnir eru á aðalfundi hluthafa með hlutfallskosningu.

2. gr.

Síðari málsg. 24. gr. orðist svo:

Nú er fulltrúi forfallaður og tekur þá varafulltrúi hans sæti í fulltrúaráðinu í hans stað.

3. gr.

Aftan við 26. gr. bætist:

Þóknun varafulltrúa fer eftir fundafjölda, sem þeir hafa mætt á, og úrskurðar fulltrúaráðið hver hún skuli vera.

Þannig samþykkt á framhaldsaðalfundi Útvegsbanka Íslands h.f., 3. ágúst 1939.

F. h. fulltrúaráðs Útvegsbanka Íslands h.f.

Stefán Jóh. Stefánsson.

Framanritaðar breytingar á samþykktum fyrir Útvegsbanka Íslands h.f., staðfestast hér með.

*Viðskiptamálaráðuneytið, 4. ágúst 1939.***Eysteinn Jónsson.***Torfi Jóhannsson.*

46

12. ágúst

BRÁÐABIRGÐALÖG**um hitaveitu Reykjavíkur.****Vér Christian hinn Tíundi**, af guðs náð konungur Íslands og Danmerkur, Vinda og Gauta, hertogi í Slésvík, Holtsetalandi, Stórmæri, Þéttmerski, Láenborg og Aldinborg,**Gjörum kunnugt:** Félagsmálaráðherra Vor hefir þegnlega tjáð Oss, að til þess að unnt verði að koma í framkvæmd og tryggja rekstur fyrirhugaðrar hitaveitu fyrir Reykjavík frá jarðhitasvæðum jarðanna Reykja og Reykjahvols í Mosfellssveit, sé nauðsynlegt að setja með bráðabirgðalögum, ákvæði um stofnun og starfrækslu hitaveitunnar, svo og um ábyrgð ríkissjóðs á lánum, sem bæjarstjórn Reykjavíkur tekur til þessara framkvæmda, og um tryggingar lánveitanda fyrir lánunum. Samkvæmt þessu teljum Vér brýna nauðsyn bera til þess að setja samkvæmt 23. gr. stjórnarskrárinnar, bráðabirgðalög um hitaveitu Reykjavíkur.

Fyrir því bjóðum Vér og skipum:

1. gr.

Bæjarstjórn Reykjavíkur rekur hitaveitu, sem hefir einkaleyfi til þess að leiða heitt vatn um lögsagnarumdæmið, þar sem bæjarstjórn ákveður, og einkarétt til

þess að selja heitt vatn til upphitunar á húsum, sem ná til hitaveitunnar. Bæjarstjórn setur reglugerð um rekstur hitaveitunnar, sem ríkisstjórnin staðfestir.

46

12. ágúst

2. gr.

Þegar bæjarstjórnin hefir leitt heitt vatn frá jarðhitasvæði jarðanna Reykja og Reykjahvols í Mosfellssveit getur bæjarstjórnin bannað, að hús, sem ná til hitaveitunnar, verði hituð með öðrum hætti en með vatni frá hitaveitunni.

Vatnshitunarkerfi, sem nú eru, eða sett verða í ný hús eða gömul, skulu þannig gerð, eða breytt svo, að þau megi tengja við hitaveituna.

3. gr.

Bæjarstjórn ákveður hvar vatnsæðar hitaveitunnar skuli lagðar um bæinn. Húseigendur kosta lagningu heimæða eftir gjaldskrá, sem bæjarstjórn setur, en ríkisstjórn staðfestir og skal ákveða gjaldið með hliðsjón af hitaþörf húseignarinnar. Heimæðarnar verða eign hitaveitunnar, sem sér um viðhald þeirra húseigendur að kostnaðarlausu.

Bæjarstjórn getur samið við húseiganda um að hann endurgreiði heimæðakostnaðinn, auk 6% ársvaxta, með jöfnum afborgunum á allt að 5 árum, enda hefir bæjarstjórn þá veðrétt í húseigninni, er gengur fyrir öllum samningsveðskuldum í eitt ár frá gjalddaga, og þarf ekki að þinglýsa þeim veðrétti.

4. gr.

Bæjarstjórn hefir rétt til að löggilda menn, er hún telur hæfa, og svo marga sem henni þykir þurfa, til þess að leggja vatnsæðar þær, sem húseigendur kosta og tengja þær við kerfi hitaveitunnar og skulu þeir fara eftir reglum, er bæjarstjórn setur.

Engir aðrir en þeir, sem þannig hafa fengið löggildingu, mega leggja vatnsæðar frá hitaveitunni inn í hús í bænum.

5. gr.

Hitaveita Reykjavíkur selur húseigendum heitt vatn til upphitunar húsa og annara nota eftir því, sem reglugerð ákveður, með verði, sem skal ákveðið í gjaldskrá, er bæjarstjórn setur og ríkisstjórnin staðfestir.

6. gr.

Jarðeigendur, sem eiga land þar sem vatnsleiðslur hitaveitunnar verða lagðar, svo og lóðareigendur og lóðarleigjendur í lögsagnarumdæmi Reykjavíkur, eru skyldir til að láta af hendi land og landsafnot, sem með þarf til þess að veita megi vatninu til Reykjavíkur og um bæinn, þar með talið grjóttak, malartekja og rista, svo og mannvirki, og að þola þær eignarkvaðir, óhagræði og takmörkun á afnotarétti, sem hitaveitan kann að hafa í för með sér, gegn bótum fyrir landspjöll eftir fyrirmælum vatnalaganna.

7. gr.

Til tryggingar skuldbindingum, sem bæjarstjórnin tekur á sig, með samþykki ríkisstjórnarinnar, í því skyni að lögð verði hitaveita til bæjarins frá jarðhitasvæðum Reykja og Reykjahvols, sem og til tryggingar lánnum, sem bæjarstjórnin kann síðar að taka vegna þessara framkvæmda eða til reksturs hitaveitunnar getur bæjarstjórnin sett allt fyrirtækið að veði.

Nær slík veðsetning til allra réttinda fyrirtækisins þ. á. m. sérstaklega einkaréttinda samkvæmt 1. grein, svo og allra eigna sem nauðsynlegar eru til þess að stofna fyrirtækið og starfrækja, sem eru: Vatn, vatnsréttindi og önnur hitaréttindi,

46 land og réttindi til landsafnota, borholur, aðveituæðar til dælistöðvar, dælistöð
 12. ágúst með öllum vélum, aðalleiðsla til Reykjavíkur, vatnsgeymar við Reykjavík, allar leiðslur um bæinn, þar á meðal heimæðar, mælar í húsum, bústaðir vélgæslumanna við dælistöð og yfirleitt öll mannvirki, sem gerð eru vegna fyrirtækisins, með öllum endurbótum og viðaukum.

Veðsetningin öðlast fullt gildi við þinglestur í Reykjavík, hvar sem hinar veðsettu eignir fyrirtækisins eru.

Vanefni bæjarstjórnin skyldur sínar samkvæmt veðskuldbindingunni skal veðhafa heimilt að taka fyrirtækið í sínar hendur og reka það fyrir eigin reikning, eða fá öðrum rekstur þess í hendur, með öllum skyldum og réttindum, sem bæjarstjórn rak það, þar til úr vanefndum um greiðslu áfallinna vaxta og afborgana hefir verið bætt að skaðlausu, en auk þess er veðhafa heimilt að ganga að veðinu ef hann kys það heldur.

Komi til þess, að veðhafi eða nýr eigandi taki fyrirtækið í sínar hendur, geta þeir rekið það með sama rétti, sem bæjarstjórnin hafði og getur hvorki bæjarstjórnin né önnur stjórnarvöld torvelað reksturinn á nokkurn hátt, og má þá heldur ekki leggja á hann nokkurt afgjald eða skatta hvorki beint né óbeint.

Réttur veðhafa til að ganga að fyrirtækinu eða taka það í sínar hendur er þó bundinn því skilyrði, að hvenær sem er getur bæjarstjórnin leyst aftur til sín fyrirtækið með því að greiða veðhafanum eða hinum nýja eiganda áfallna vexti og afborganir að skaðlausu ásamt kostnaði þeirra við yfirtökuna og reksturinn, þar á meðal reksturstað þeirra.

8. gr.

Ríkisstjórninni er heimilt, gegn þeim tryggingum, sem hún metur gildar, að ábyrgjast fyrir hönd ríkissjóðs lán, sem bæjarstjórn Reykjavíkur tekur til stofnunar hitaveitu samkvæmt lögum þessum allt að 8,5 milljónum íslenskum krónum eða jafngildi þeirrar upphæðar í annari mynt.

9. gr.

Öll gjöld samkvæmt lögum þessum eða reglugerðum og gjaldskrá, sem verða settar samkvæmt þeim, má taka lögtaki á kostnað gjaldanda.

10. gr.

Með lögum þessum eru úr gildi numin lög nr. 41 14. maí 1938 og önnur lagaákvæði, sem koma í bága við þessi lög.

11. gr.

Lög þessi öðlast þegar gildi.

Eftir þessu eiga allir hlutaðeigendur sér að hegða.

Gjört á Marselisborg, 12. ágúst 1939.

Undir Vor konunglega hönd og innsigli.

Christian R.

(L. S.)

Stefán Jóh. Stefánsson.